



اسم المادة: الأوب مع الخلق

من سلسلة: على هري النبي - شرح كتاب صحيح الأوب المفرد

لفضيلة الشيخ: أحمد جلال



Way2allah.com



إنتاج فريق التفريغ بشبكة الطريق إلى الله



اسم المادة: الأدب مع الخلق

من سلسلة: على هدي النبي - شرح كتاب صحيح الأدب المفرد

لفضيلة الشيخ: أحمد جلال

السلام عليكم ورحمة الله وبركاته.

الحمد لله رب العالمين، والصلاة والسلام على أشرف المرسلين، سيدنا محمد، وعلى آله وصحبه ومن تبعهم بإحسان إلى يوم الدين.  
أما بعد:

أهلاً وسهلاً ومرحباً بإخواني وأخوتي، وأهلي، وأحبابي، وأسأل الله - سبحانه وتعالى - الذي جمعني وإياكم في هذه الساعة المباركة على طاعته، أن يجمعني وإياكم في جنته ودار كرامته، مع النبيين، والصديقين، والشهداء، والصالحين، وحسن أولئك رفيقاً.  
وبعد:

اليوم بإذن الله - تبارك وتعالى - مع الدرس الخامس إن شاء الله والسادس من هذه السلسلة المباركة "شرح كتاب الأدب المفرد" للإمام البخاري، رحمة الله - تبارك وتعالى - عليه وعلى كل علمائنا الأفاضل الكرام.

أما الدرس الخامس، فهو الخامس والسادس مرتبطين ببعض، ولعل السابغ كمان هيكون معاهم إن شاء الله، والثلاث دروس دول بتتكلم عن أهم نقطة متعلقة بحياة الإنسان المسلم.

أحبابي اللي يقرأ كتب التنمية البشرية، ويقرأ الكتب المتعلقة بالعلاقات الإنسانية بعضها وبعض، وإزاي نقدر نحافظ عليها، بيلخص الكلام ده كله في كلمة قالها "ديل كارينجي"، قال: "إن تسعين في المية من نجاح العلاقات الشخصية بين الناس متوقعة على قضية الاهتمام"، لو اللي قدامي النهاردة أنا عايز أكسبه، وعايزه فعلاً يحبني، ويكون إنسان فعلاً قريب مني جداً، حاول بقدر المستطاع إنك تبين له إنك مهتم بيه، وإنك بتحبه، وده فعلاً واقع، أنا جالي أحد الشباب، الشاب ده كان قرر إنه ينتحر، فلما قعد معايا في المسجد، وبدأنا إن أحنا نتكلم مع بعض، وناخذ ونندي مع بعض، قلت له: يعني مفيش حاجة في الحياة يعني تخليك تتراجع عن هذه الفكرة، فقال لي: فيه حاجة واحدة بس تخليني إن أنا أترجع عن فكرة الانتحار. قلت له إيه؟ قال لي جاك، قلت له مين جاك؟ قال لي دا ده الكلب بتاعي! قال لي: أنا والدتي ما بتهتمش بيا، والدي ما بيهتمش بيا، إخواني الكبار والصغيرين كل واحد في طريق، وأنا حاسس إن أنا وحيد ما حدش بيهتم بيا، إلا الكلب ده، الكلب ده بأكون حاطه فوق على السطح أول ما يشوفني يجري عليا، ويطلع كدا يقف على رجله، ويحط أيديه على كتافي ويحضني، فدي الحاجة الوحيدة اللي ممكن تخليني أفكر إن أنا ألا أنتحر.

أذكر برضه، إن زمان وأنا في ثانوي كده، كنت شغال مع حد من قرايينا في مطعم فول، فكنت بعمل سندوتشات وحاجات من كده، وكان ابن خالتي دائماً بيشف فيه واحد مجنون كده، يبجي كل يوم الصبح، فكان يقول لي: أول ما يجيالك حط له الأكل، وحط له الشرب، وحط له كل اللي هو عايزه، فكنت بالفعل بعمل كده، أحط له أكله، وأحط له شربه، وأطبطب عليه، وأكلمه كلمة طيبة، هو مجنون أصلاً، -

سبحان الله! - وكان لما يقعد معايا يحكي لي بقى عن أحداث حرب الاستنزاف وحرب ثلاثة وسبعين، فتبين لي بعد كذا من حد من جيرانه، إن الراجل ده كان ظابط أصلاً، وما أصابجوش الجنون إلا بسبب إن هو كان بيحب واحدة حب شديد جداً جداً، وتزوجها، ونظرًا طبعًا هو كان بيسافر كثير عشان هو كان حكم شغل، وحكم عمله، والكلام ده، فرجع في يوم فجأة، عايز يعملها مفاجأة، فلقاها -والعياذ بالله- مع واحد تاني، في قلب بيته، فطبعًا أصيب بصدمة كبيرة جداً، وأصابه الجنون، إن هو حس في يوم من الأيام إن هو مفيش حد بيهتم به، أو حد بيحبه، أو حد بيراعيه.

نموذج تالت ذكره "ديل كارنجي" في أعظم كتب، وأشهر كتبه "كيف تكسب الأصدقاء؟" فقال: إن كان ليه دكتور زميله صاحبه، في أحد المصحات النفسية، فكان بيعمل يعني دراسة وإحصائية عن أهم الأسباب اللي بتوصل الناس لمرحلة الجنون، فكان بيقول إن كانت عندهم مريضة، المريضة دي كانت تزوجت، وكانت طبعًا بتحلم برضه، يعني كانت من أمانيتها برضه إن هيا تحمل، وتشيل الطفل ابنها الصغير وكده، فيقول: زوجها ده كان بيضربها ضرب عنيف جداً، كان بيشتتها، كان بيطردها في عز البرد، في أيام ما كان التلج بينزل، بيطردها ويهددها والكلام ده، فأصيبت بالجنون، فالدكتور ده بيقول لما جت عندنا مستشفى الأمراض العقلية، كانت المرأة دي كل يوم تعمل مسرحية إن هي بتزوج، وإن فيه زوجها بقى إيه ماشية معاه بقى كأهم في زفة كده، وإن هو بيحبها، وإن هي بتحبه، وبعد شوية تنادي على الدكتور يا دكتور يا دكتور! شفت فلان ده، ده اللي ربنا -عز وجل- رزقني به، وتقعد تمزه كده، وهو أصلاً مفيش أي حاجة في أي حاجة، ولكن هي لأن الاهتمام بيها، وعنايتها، والعناية بيها، والاهتمام بها، فقدته في العالم الحقيقي، فهي بتنشده الآن في العالم اللي هو الخيالي، أو العالم الغير واقعي. فالدكتور بيقول إن أكثر من تسعين في المية من أصحاب الأمراض النفسية، إنما أصيبوا بهذه الأمراض بسبب قلة العناية وقلة الرعاية.

أنا الآن معانا حالة خطيرة جداً، يعني أسأل الله -سبحانه وتعالى- إنه يعيننا عليها، برضه نفس القصة لأخت من الأخوات، الأب بيضرب، الأم بتشتت، الأخوات بيهينوا، أخ آخر حاول الاعتداء، فهي -سبحان الله- أصيبت بمرض نفسي خطير جداً جداً، يعني أسأل الله -سبحانه وتعالى- أن يعينني أنا وزوجتي على هذه الأخت، إن احنا نحاول نخرجها من الواقع اللي هي عايشة فيه.

القضية قضية عدم اهتمام الناس بعضهم ببعض، في حالة إن أنا لن أهتم بإنسان، تكون النتيجة إن فعلاً حقيقة أنت هتخسر كثير جداً. أذكر موقف أخير برضه من واقع حياتنا، ونخش بقى على كلام الإمام البخاري، اللي أصل للأصول دي، أصول العلاقات بين الناس بعضها وبعض، يذكر أهل الشيخ العريفي -حفظه الله-، وأسأل أن يرحمه ويرحمنا جميعاً برحمته الواسعة، يذكر إن فيه دكتورة ما شاء الله ناجحة جداً جداً، العيادة عندها لا تخلو أبداً أبداً، ولما سأل عن السر في نجاح الدكتورة وارتباط كل المرضى بها من النساء طبعًا، فبتقول إن هي عندها يعني أجندة كده بتكتب فيها كل مريضة واسمها واسم الحالة اللي كانت عندها، وآخر مرة زارت أمي؟ وزارت ليه؟ يعني هي كانت زارت مثلاً عشان ابنها كان تعبان وعنده برد والكلام ده، وبتسجل كل ده في أجندة عندها، وأول ما مريضة بتتصل عليها في العيادة مثلاً، بتخلي مثلاً الممرضة بتد، أيوه مين؟ ده فلانة الفلانية، طب لحظة واحدة أحولك على الدكتورة، تخش الممرضة تقول لها ده فلانة الفلانية كلمتك، هي بسرعة من الأجندة تطلع اسمها، وآخر مرض كان عندها، وآخر مشكلة كانت عندها، فالدكتورة أهلاً وسهلاً أزيك أخبارك؟ عاملة إيه يا فلانة، وأحوالك إيه؟ ما شفتكيش من زمان، بقى لي شهرين ما شفتكيش، طب ابنك اللي كان تعبان أخبره إيه؟ طب والبرد؟ طب والرشح؟ طب كذا طب كذا طب كذا؟ فهي في الجانب الآخر المريضة، أو أم الطفل المريض، تبقى في حالة ذهول تام، هي معقول من شهرين فإكراني مع إن أنا آخر مرة رحت لها العيادة، كان فيه عشرين ثلاثين أربعين خمسين حالة قبلي، وخمسين حالة بعدي، معقول فإكرين في وسط المية حالة، فبتكون النتيجة إن المريضة دي بترتبط بالدكتورة دي ارتباط وثيق جداً، ليه؟ هي حسنت إن هي بتهتم بيها جداً، حسنت

إن هي بتحبها، حسنت إن هي مقرباها، حسنت إن هي ما شاء الله يعني مهتمة بيها وبتربهاها، فكانت النتيجة إن عيادتها طبعًا لا تخلو طبعًا بفضل الله -عز وجل-، ثم بما تقوم به من إظهار مشاعر الاهتمام والرعاية بهذه المريضة.

الإمام البخاري -رحمه الله-، طبعًا وعلمائنا وطبعًا من قبل ذلك النبي -صلى الله عليه وسلم-، كانوا يعلمون علم اليقين الجزئية دي، فكان النبي -صلى الله عليه وسلم- أصل لنا عدة أصول مهمة جدًا، إزاي نخلي الناس تحبنا؟ ونخلي الناس في نفس الوقت تكون، ما شاء الله لا قوة إلا بالله، يعني معانا العلاقة طيبة جدًا جدًا وفي نفس الوقت هيبداً يديك بعض الحاجات كده يقول لك طب خد بالك من دي علشان ما ينفعش تعملها، لأن دي بتفسد العلاقات بين الناس بعضها وبعض.

أحبابي أنا قرأت أكثر من مية وخمسين كتاب متعلق بالجزئية دي في كتب التنمية البشرية، وكان من أهم الكتب اللي أنا اهتمت بيها قوي كتاب "دليل كارنجي" كيف تكسب الأصدقاء، والكتاب ده حقيقة كتاب رائع جدًا جدًا، ولكن والله حقيقةً أحبابي، كل ما بقرأ فيه قاعدة كده، أو بقرأ فيه فصل جديد، أقول -سبحان الله-، إحنا ليه مش عايزين نطلع الخير اللي عندنا للناس؟ ليه هما قدرنا ياخدوا الحاجات دي ونشروها وسط الناس؟ إحنا ليه مش عايزين نطلع كم الخير، وكم القواعد اللي الرسول -صلى الله عليه وسلم- وضعها لنا، أو ربنا -عز وجل- وضعها لنا في القرآن، ونطلعها للناس علشان تتآلف القلوب، ويجتهد كل إنسان منّا إن هو فعلاً يكسب الناس، إحنا محتاجين جدًا إن أحنا نكسب الناس.

لاحظوا أحبابي إن المسلمين الأوائل مانشروش الإسلام بالسيف زي ما بعض الناس بتقول، ولكن نشروا الإسلام حقيقة بالتعاملات الطيبة اللي كانت بينهم وبين بعض، أنا لو رايح النهاردة أشتري قماش من عند أبي حنيفة، وأنا واحد يهودي، أو واحد نصراني، أو واحد ملحد، ورايح أشتري من عنده قماش، فبقول له، أنا عاوز أشتري من القماش ده، فيقول لي طب معلش! القماش ده فيه عيب كذا وكذا وكذا ممكن ما ينفعش معاك، إنما القماش ده كويس جدًا جدًا جدًا، فأنا أقول له طب وده أخباره إيه؟ يقول له والله أنا جايه بكذا وأنا هكسب منه كذا، فهو ليك بكذا، فأنا أجد منه الصدق، وأجد منه الأمانة، وأجد منه الحاجة دي ممكن تكسبه كثير جدًا، فهو رفض المكسب الحرام علشان يقول لي خد بالك من المكسب ده، واداني النصيحة، وأشار عليّ بالشيء الكويس اللي هو بالنسبة ليه، هتكون النتيجة إيه؟ هتكون النتيجة هوا أنا لما اسأل هو ده مين؟ ده أبو حنيفة، مين أبو حنيفة؟ ده ديانتته إيه اللي بتأمرة إن هو يكون صادق وأمين كده؟ ده ديانتته الإسلام، تكون النتيجة إن أنا لازم أسلم، لما أشوف مثل هذه الأخلاق، وأشوف مثل هذه التعاملات

أحبابي، مما لا شك فيه إن أكثر حاجة تجذب الناس للإسلام هي إن أحنا نعمل معاهم حاجتين:

أولاً: يشوفوا منّا إن أحنا مهتمين بيهم، من باب الخوف عليهم، أو الحرص عليهم، الحاجة الثانية إن هما يشوفوا منّا أخلاق، يشوفوا منّا أدب، يشوفوا منّا أمانة، يشوفوا منّا أخلاق، أحد إخواننا اللي بيشغلوا في الدعوة إلى الله -عز وجل- سافر لألمانيا، ومسك مركز إسلامي كبير جدًا جدًا هناك، ففي يوم بيقول أنا كنت راكب الميكروباص، وبعد كده اتنقلت من المركز ده لمركز تاني، وانتشر في الولاية اللي أنا رايح فيها، أو المدينة اللي رايح فيها، إن فيه شيخ جاي للمكان ده، فيقول أنا رحت طبعًا بزي المسلمين، لابس الجلابية، باللحية، الطاقية، فركبت الأتوبيس، فرحت أديت الراجل المبلغ المادي اللي هو المفترض ياخده، يعني مثلاً أنا أديتته مثلاً عشرة دولار هو المفترض ياخذ مثلاً سبعة أو ثمانية، أو ياخذ مثلاً سنتات معروفة مثلاً أو كده، أديت له مية، هو المفترض يرد لي اتناشر سنت، ده على التقريب يعني، فهو أنا أديتته المية فهو المفترض يديني اتناشر سنت الباقي، فهو أداني تمتناشر سنت زيادة، فأنا خدته وأنا عارف إن في ستة سنت زيادة حاططهم في جيبي، وأنا في صراع نفسي داخلي، صراع نفسي داخلي، هل يا ترى أنا أرد له ست سنتات، طب ما هي الحكومة الألمانية أصلاً مش محتاجة



الكلام ده أصلاً، أيه ستة سنت أصلاً؟ وأنا في نفس الوقت لسه جاي جديد، ومحتاج أجمع أموال، طب أجمع أموال! ما أجمعش، أرد وما أردش! فكانت النتيجة تقول لي أنا بعد صراع كبير جداً، وأنا نازل طلعت ستة سنت وأديتهم للسواق، وقلت له: أنا يعني أكيد الستة الستة دول غلطت فيهم، وأنا أخاف عليك إن أنت تغلط هنا ستة سنت وهنا ستة سنت وهنا ستة سنت، فأنت تيجي في آخر الشهر أصلاً متلاقيش ليك راتب، لأن أنت بيتخصم منك كل العجز ده، وقال له خد بالك، وخذ بالك والكلام ده، وحسسه فعلاً إن هو مهتم بيه، ونصحه وأشار عليه بمشورة كويسة، وخذ بعضه ونزل دخل المسجد.

فبيقول ثاني يوم لقيت فيه واحد داخل علي، فبيسلم علي، فبيقول أنا الشكل عارفه، بس أنا مش عارف مين ده، سلم علي، وقال: أنا جاي أشهر إسلامي، فأنا فرحت جداً إن أنا في ثاني يوم لي في المركز واحد جاي يشهر إسلامه، فأنا بسأله أنت سمعت درس أمبارح؟ لأ، طب أنت سمعت كلمة أمبارح؟ طب أنت عايز تأسلم ليه؟ قال له أنا مش عايز أسلم عشان أنا سمعت درس، ولكن أنا عايز أسلم، لأن أمبارح أنا كنت عارف إن فيه شيخ جديد جاي للمكان هنا، وأنا تعمدت إن أنا أزود على المردود ليك، الستة سنت دول عشان أشوف مدى أمانتك، فلما لقيتكم أولاً أمين، ولقيتكم فعلاً واستشعرت منك إنك خايف علي وحريص علي، رغم إن أنت على دين خلاف ديني، رغم إن أنت من جنسية خلاف جنسيتي، ومع ذلك أنت جيت قدمت لي نصح، وقدمت لي إرشاد، وحسستني أوي إن أنت عايز ترعاني، وأنا مش على نفس دينك، فقلت: أmaal لو كنت على دينه هيهتم بي ازاي، وهيرعاني ازاي، فكانت النتيجة إن هو دخل في الإسلام بسبب إيه؟ بسبب حاجات بسيطة جداً، ووصل بيها لقلب الناس، هي الجزئية اللي أنا دائماً هندن عليها خلال الدرس ده كله والدرس اللي بعده، واللي بعده، هي جزئية إن أحنا في اليوم اللي هنظهر فيه للناس إن أحنا مهتمين بهم جداً، إن أحنا حريصين عليهم جداً، إن أحنا بنقف معاهم في مواقف هما يعني محتاجين حد يقف فيه معه، هتكون نتيجة جميلة جداً.

عايز بس أختم معلش ساحووني، طبعا الكلام ده كله بشوفه من خلال العلاقات العامة، إحنا كم رأينا من شاب انتكس، بسبب إن زميله اللي حواليه ما وقفوش جنبه، كم رأينا من شاب كان بيتزوج، شاب ملتزم، وكان بيطلب منا إن أحنا نكون واقفين معاه، أثناء بقى وهو بيطلع العفش، مش عارف بيعمل إيه، بيسوي إيه، كان بينتظر منا، واحنا عارفين إن عليه ديون كتير جداً بسبب الزواج، إن أحنا نروح مثلاً نقف معاه في الدين، ونقضي عنه الدين ده، وكانت النتيجة إنه ما وجدش في الموقف ده إلا الشلة القديمة، إلا الأصحاب القدماء، هما اللي كانوا واقفين معاه، وهما اللي كانوا بيساعدوه، هتكون النتيجة إيه؟ هيرجع لنا كملتزمين، هيرجع لنا كبيئة تدين، ولا هيروح للأصحاب التانيين؟ لما يروح للأصحاب التانيين نظهر بقى الاهتمام، ولكن نظهر الاهتمام بعد فوات الأوان، وده ما ينفعش، ناخذ بالناس من الكلام ده.

علشان كده الشيخ بدأ يذكر لنا المعاني دي في الكتاب، فالشيخ ذكر لنا كتاب مهم جداً، قال أول حاجة: "باب معونة الرجل لأخاه"، وده في الحديث رقم ٢٢٠.

وفيه: أن النبي -صلى الله عليه وسلم- لما سأله أبو ذر: "سَأَلْتُ النَّبِيَّ صَلَّى اللَّهُ عَلَيْهِ وَسَلَّمَ أَيُّ الْعَمَلِ أَفْضَلُ؟ قَالَ: إِيْمَانٌ بِاللَّهِ، وَجِهَادٌ فِي سَبِيلِهِ، قُلْتُ: فَأَيُّ الرِّقَابِ أَفْضَلُ؟ قَالَ: أَعْلَاهَا ثَمَنًا، وَأَنْفُسُهَا عِنْدَ أَهْلِهَا، قُلْتُ: فَإِنْ لَمْ أَفْعَلْ؟ قَالَ: تُعِينُ ضَائِعًا".

لو واحد في يوم من الأيام ضائع، ضائع بقى فكرياً، مشتت ذهنيّاً، مش عارف يوصل لحل، تكون أنت واقف معاه عشان تحاولوا تفكروا مع بعض، وتفكروا مع بعض بصوت عالي، عشان تخليه يوصل للطريق الصحيح، أو يوصل للمكان الصحيح.

"تعين ضائعاً" أو واحد تايه في الطريق تاخده من ايديه كده، وتوصله لحد ما هو يكون عايز، فيستشعر أن أنت مهتم به، رغم إن مفيش أي علاقة بينك وبينه إلا رابطة طبعاً الإسلام والإخوة في الدين.

"تُعِينُ صَاحِبًا، أَوْ تَصْنَعُ لِأَخْرَقَ"، واحد لا يجيد الصنعة المعينة، فأنت تساعد، وتعينه، وتفهمه، وتعرفه لحد ما يكون صناعي ما شاء الله كويس جدًا. "قَالَ: فَإِنْ لَمْ أَفْعَلْ؟ قَالَ: تَدْعُ النَّاسَ مِنَ الشَّرِّ، فَإِنَّهَا صَدَقَةٌ تَصَدَّقُ بِهَا عَلَى نَفْسِكَ".<sup>١</sup>

مش كده ويس، ده الشيخ كمان ذكر لنا باب ثاني، وهو باب ذكر فيه حديث مهم جدًا اللي هو الشيخ بيذكر فيه، يقول "باب ما يجب من عون الملهوف"، واحد واقع في مشكلة! واحد واقع في أزمة! ما تسيبهوش، خد بالك إن الشاب اللي جالي وعازي ينتحر، لأن لا حاسس بأب، ولا حاسس بأم، ولا حاسس بأخوات، ولا حاسس بأصحاب، كل أصحابه اللي حواليه بيخونوه بيغدروا بيه، فبالتالي هو كان عازي ينتحر، إلا الكلب اللي كان دايماً بيستشعر إن هو بيحبه، إن هو يعني بيهتم بيه جدًا.

الشيخ يقول "باب ما يجب من عون الملهوف"، لو في يوم من الأيام واحد ملهوف، حاول بقدر المستطاع إنك تقف معاه، وتساعد، وتعينه، وتاخذ بأيديه، وده اللي النبي -صلى الله عليه وسلم- ذكره في حديث ٣٠٥ عندنا اللي هو حديث أبي ذر السابق؛ الشيخ ذكره ثاني، وحديث ٣٠٦ وهو حديث إن النبي -صلى الله عليه وسلم- قال: "عَلَى كُلِّ مُسْلِمٍ صَدَقَةٌ، فَقَالُوا: يَا نَبِيَّ اللَّهِ، فَمَنْ لَمْ يَجِدْ؟ قَالَ: يَعْمَلُ بِيَدِهِ، فَيَنْفَعُ نَفْسَهُ وَيَتَصَدَّقُ قَالُوا: فَإِنْ لَمْ يَجِدْ؟ قَالَ: يُعِينُ ذَا الْحَاجَةِ الْمُلْهُوفَ"، تشوف واحد فقير، تبقى واقف معاه.

فالنبي -صلى الله عليه وسلم- قال: "يُعِينُ ذَا الْحَاجَةِ الْمُلْهُوفَ قَالُوا: فَإِنْ لَمْ يَجِدْ؟ قَالَ: فَلْيَعْمَلْ بِالْمَعْرُوفِ"<sup>٢</sup>، إذا ما كنتش قادر خالص إن أنت تهم به، أو تساعد، أو تعينه، خلاص، خد بالك أهم حاجة إنك لما تتكلم معاه تتكلم معاه بالكلمة الطيبة.

الشيخ برضه أتكلم معانا على الأمر الثاني، بعد إن أحنا نعين الناس، الحاجة الثالثة بنقول لك: حاول دايماً في علاقاتك مع الناس، ودي كانت كلمة بيتكلم عليها علماء التنمية البشرية، إن حاول بقدر المستطاع إنك عشان تكسب الناس خد بالك من كل كلمة أنت بتقولها، خد بالك إنك ما تقولش كلمة في يوم من الأيام تجرح، أو تتكلم في يوم من الأيام بكلمة تتعبه.

أذكر ليكم مثالين، وسامحوني أنا بذكر من الواقع كثير، علشان أقول لكم الواقع ده بقى كده بسبب اللي أحنا عايشين فيه الآن، أخت من الأخوات كان في أحد المصالح مثلاً الحكومية، كانت منتظرة دورها عشان تخلص حاجة لها، وفيه واحدة مسلمة، وهي متبرجة جدًا، عندها حوالي سبعين سنة، وكاشفة شعرها، ومكياج، وميك اب، ولايسة بادي، ولايسة استرتش، ورايحة جاية، برضه منتظرة دورها وحاجات من كده، فالأخت المنتقبة قالت أنا لازم أقوم أتكلم معاه، لازم أقوم أنصحها، لازم أقوم أذكرها بالله، فخدوا بالك ممكن عندنا طرق كثير جدًا للنصح، وطرق كثير جدًا للتذكير، ولكن شوفوا الأخت بدأت معاه قايمة لها إيه؟ لو سمحت يا حاجة! دي كانت أول نقطة، لو سمحتي يا حاجة، ممكن أسألك سؤال؟ قالت لها اتفضللي، قالت لها: هو أنت مسلمة ولا كافرة؟ طبعاً أنا ما أقولكمش طبعاً إيه اللي حصل ولكن يعني أنا مش عارف هي الأخت دلوقتي في العناية المركزة، وربنا بقى يستر عليها يعني.

أخت ثانية، شغالة في مكان ما، ومعها اتنين زميلاتها، واحدة عندها خمسة وأربعين سنة، وطُلِّقَتْ، وكانت بتمر بظروف صعبة شوية، وبعد كده تزوجت وهي عندها ستة وأربعين سنة سبعة وأربعين سنة، ربنا -سبحانه وتعالى- رزقها، الثانية بنت عندها خمسة وعشرين سنة متزوجة بقالها ست سنين، وإلى الآن ربنا -سبحانه وتعالى- ما رزقهاش، فهي حبت إيه! لما دي قالت إن أنا الحمد لله حامل، ودي طبعاً شافت إن هي إيه؟ اتكسرت شوية بسبب إن ربنا لسه ما رزقهاش، أنتم عارفين الحاجات دي حساسة شوية بالنسبة للبنات بالذات، فقامت الأخت دي قالت إيه، أنا لازم بقى أهدي الأمور شوية وأقول لها كلمتين كده يهدوا الأمور شوية، فهي للأسف ما قالتش كلمتين يهدوها، دا هي حدفها بقالين طوب في دماغها، هي قالت لها: روحي جاتك خيبة، دي عندها سبعة وأربعين سنة وخلقت، وأنت عندك خمسة وعشرين سنة لسه ما

<sup>١</sup> صحيح البخاري<sup>٢</sup> صحيح البخاري

خالفتنيش؟ هي قالت: أنا كنت عايزه أهنر معاها فطبعًا عشان أهدي من روعها شوية، ولكن للأسف أنا حاسس إن هي ضربتها طلقتين في دماغها.

طبعًا كانت النتيجة إن الأخت انهارت نفسيًا طبعًا، وبكت بكاءً شديدًا، وحصلت مشكلة كبيرة جدًا يومها، ده طبعًا إن أحنا ما خدناش، أو ما اتعلمناش، أو ما اتربيناش على إن أحنا، خد بالك من كل كلمة أنت بتقولها، ربنا -عز وجل- أصل لهذا الأصل في القرآن، فقال: **"وَقُولُوا لِلنَّاسِ حُسْنًا"** البقرة: ٨٣.

الإمام البخاري -رحمة الله عليه-، عمل باب كامل، **"باب قول المعروف"**، لما تيجي تتكلم كلمة، لازم تكون الكلمة دي كلمة معروف، كلمة خير، ما تكسرش بيها حد، ولا تجرح بها حد، ولا تؤذي بيها مشاعر حد، النبي -صلى الله عليه وسلم- قال، وذكر فيها حديث عبد الله بن يزيد الخطمي، قال: قال رسول الله -صلى الله عليه وسلم-: **"كُلُّ مَعْرُوفٍ صَدَقَةٌ"**، وذكر طبعًا ده تحت قول المعروف، من باب إن من أهم الأمور اللي تدخل تحت فعل المعروف؛ القول المعروف، الكلمة الطيبة، الكلمة الحسنة، الكلمة التي لا تؤذي بها أحد، الكلمة التي أعبر بها عن الكلمات الطيبة، حتى وإن كانت الكلمة دي في يوم من الأيام هي كلمة حب، إن أنا في يوم من الأيام أقول لواحد أنا بحبك في الله، طبعًا بين واحد وواحد، وواحدة وواحدة.

زي ما النبي -صلى الله عليه وسلم- في يوم من الأيام "أخذ بيديه جميعًا بكفي الحسن أو الحسين صلوات الله عليهما وقدميه على قدم رسول الله صلى الله عليه وسلم ورسول الله صلى الله عليه وسلم يقول: إِرْقَه (وفي لفظ: تَرَقَّ / ٢٧٠) قال فرقي الغلام حتى وضع قدميه على صدر رسول الله صلى الله عليه وسلم ثم قال رسول الله صلى الله عليه وسلم: افتح فاك ثم قبله ثم قال اللهم أحبه فإني أحبه"<sup>٤</sup>

أنا النهاردة أما أشوف واحد، -سبحان الله-! جاي في يوم من الأيام بيتكلم معايا بالكلمة دي، يقول لي: -سبحان الله- والله أنا بتصل عليك حاجة واحدة بس، أنا والله أنا مش عايز لا مصلحة، ولا عايز كذا، ولا عايز كذا، ولكن في بعض الأوقات بيقول لي: أنا منتظر بس إن حد يقول لي أنا بحبك في الله، مش أكثر من كده.

هحكي لكم حاجة من جوه كواليس الدعاة، ربنا يا رب يحفظهم جميعًا، الدعاة دول بشر، في بعض الأوقات يصاب بهم شديد جدًا، وغم شديد جدًا، فأروح أكلمه أقول له إنت زعلان ليه؟ قال لي: -سبحان الله- ما حدش بيتكلم إلا علشان سؤال، علشان فتوى، علشان كذا، علشان كذا، علشان كذا، وكم نحن نشتاقي -دا ده داعية إلى الله- يقول لي: وكم أشتاق إن حد يرفع سماعة التليفون، يقول لي: أنا مش عايزك حاجة، كل اللي أنا عايزه بس منك، إن أنا أقول لك أنا بحبك في الله، ويقفل التليفون، وتنتهي المسألة على كده.

ما أعظمها من كلمة ممكن تفرق كثير جدًا جدًا جدًا في حياة الناس، -سبحان الله-! النبي -صلى الله عليه وسلم- علمنا الأصل ده، تخيلوا في يوم من الأيام النبي قابل معاذ فياخذ بإيديه كده، فيقول له: **"يا معاذ، واللّٰهُ إِنِّي لَأُحِبُّكَ"**، بس، **"واللّٰهُ إِنِّي لَأُحِبُّكَ"**، ياخذ بإيديه ويقول له **"واللّٰهُ إِنِّي لَأُحِبُّكَ"**، ثم بعد ذلك يقول له: **"أوصيك يا معاذ لا تدعنَّ في دُبرِ كلِّ صلاةٍ تقول: اللَّهُمَّ اعنِّي على ذِكْرِكَ وشُكْرِكَ وحسنِ عبادتِكَ"**، تخيلوا قدر ما وقع في صدر معاذ بعد ما النبي -صلى الله عليه وسلم- يقول له: **"إني أحبك في الله"**.

<sup>٣</sup> صحيح البخاري

<sup>٤</sup> الأدب المفرد

<sup>٥</sup> صحيح أبي داود

النبي -صلى الله عليه وسلم- يلقى في يوم من الأيام أبي بن كعب فيأخذ بيديه كده ويقول له: "يا أبي إن الله أمرني أن أقرأ عليك"، مشاعر الاهتمام، "إِنَّ اللَّهَ أَمَرَنِي أَنْ أَقْرَأَكَ الْقُرْآنَ قَالَ: اللَّهُ سَمَّيَنِي لَكَ؟" هو ربنا اهتم بي فبالتالي قال أسمى في السماء، في الملكوت الأعلى وسماني الله لك! فقال: وسماك يا أبي فبكى أبي فرحاً، الكلمة الطيبة ح حسسوا الناس إن أنتم مهتمين بهم، إن أنتم بتراخوا مشاعرهم.

ابن مسعود في يوم من الأيام، يعني لما طلع شجرة، الحديث معروف، والشيخ ذكره، هياطي معنا الآن، لما طلع في يوم من الأيام على شجرة عشان يجيب للنبي عود أراك، وجت الريح كشفت عن ساقه، فالناس كلها ضحكت على دقة ساقه، فاتخرج في الوقت ده، فالنبي شف واحد اتخرج، يعني مثلاً ممكن في يوم من الأيام مثلاً أيه، نشوف واحدة وهي مثلاً حصل لها موقف محرج، فأنا عملت نفسي وبصيت ناحية تانية كباي ما شفتش حاجة عشان ما أخرجهاش، الموقف ده ما يتعداش، موقف قمة الأدب، قمة الاحترام، قمة الاهتمام، الكلمة الطيبة فعلاً اللي ترقق قلوب الناس، وتراعي مشاعر الناس، -سبحان الله-! النبي -صلى الله عليه وسلم-، فشاف الصحابة عملوا كده، فأكد ابن مسعود في الوقت ده اتخرج جداً على دقة ساقه، وبيداري بقى كده علشان يداري رجليه اللي الناس ضحكت عليها، فالنبي -صلى الله عليه وسلم- أتدخل بسرعة بالكلمة الطيبة اللي ترفع الحرج عن عبد الله بن مسعود، فقال: أتضحكون من دقة ساقية؟ شوفوا تحويل الكلام، "أَتَضَحَّكُونَ مِنْ دِقَّةِ سَاقِيهِ! وَالَّذِي نَفْسِي بِيَدِهِ لَهُمَا أَتَقَلُّ فِي الْمِيزَانِ مِنْ جَبَلٍ أَحَدٍ".<sup>٧</sup>

الإمام البخاري يقول لنا: خدوا بالكلم يا جماعة من كلماتكم، الكلمة لازم لما تكون طالعة، تكون طالعة بفضل الله بصورة كويسة. أذكر ليكم موقف تاني، علشان أقول لكم أحد إخوانا كان ابتلي بلاء شديد جداً جداً جداً، وكان ابنه في المستشفى في الحضانة لسه مولود، وكان يعني في الحضانة بقى، الكلام ده، وأنتم عارفين الأب في الحالة دي، أنا مررت بالظروف دي قبل كده، فعارف يعني إيه يكون الابن في الحضانة، وعارف يعني إيه الدكتور يقول لي الولد قلبه توقف والحمد لله رجع تاني، الولد مش عارف إيه، القصة دي بتبقى صعبة جداً، الولد انتقل النهاردة من على الجهاز التنفسي الطبيعي إلى جهاز السباب، لا مش على السباب ده الولد دخل على العناية المركزة، اللي هي التنفس الصناعي والكلام ده، فطبعاً الاضطراب النفسي اللي بيمر به الأب في الوقت ده بيبقى صعب جداً، فيقول لي أنا في يوم من الأيام اتكسرت كسرة ما بعدها كسرة، فبقول له ليه؟ قال لي: أنا كل يوم بعشم نفسي وبحسن الظن في ربنا، إن ربنا هيقوم لي الولد، وهيبقى كويس، وهيبقى زي الفل، فرحت طلعت للولد شهادة ميلاد، فعلى ما خلصت شهادة الميلاد، رحت للولد في الزيارة طبعاً عشان أدليهم الحاجات اللي الولد محتاجها، فقلت الممرضة بتقابلني فبتقول لي أنت اتأخرت ليه؟ قلت لها معلش أنا كنت بطلع للولد شهادة ميلاد، فقامت قايلاله وتطلع له شهادة ميلاد ليه؟ ما هو كده كده ميت، الكلمة كانت يعني!!

خدوا بالكلم من كلماتكم، "وَقُولُوا لِلنَّاسِ حُسْنًا"، ليه ربنا -عز وجل- أصّل على هذا الأصل؟ وليه الإمام البخاري -رحمة الله عليه-، ينقل كلام النبي في الجزئية دي، لأن ربنا -عز وجل- بيقول لنا الحكمة من وراء اختيار الكلمة فيقول "قُلْ لِعِبَادِي يَقُولُوا الَّتِي هِيَ أَحْسَنُ إِنَّ الشَّيْطَانَ يَنْزِعُ بَيْنَهُمْ" الإسراء: ٥٣، الشيطان بياخد الكلمة اللي هي حمالة لأكثر من وجه علشان يوقّع بما بين الناس.

تخلوا علاقات النبي -صلى الله عليه وسلم- بالصحابة، قاعد معهم فيجي ينصحهم فيقول لهم: "إِنَّمَا أَنَا لَكُمْ بِمَنْزِلَةِ الْوَالِدِ؛ أَعْلَمُكُمْ"، أنا لكم زي أبوكم، أنا بعلمكم، شوفوا يعني مدى الاهتمام، ومدى الرعاية من النبي -صلى الله عليه وسلم-، شوف النبي -صلى الله عليه وسلم- لما كان بيحسس الصحابة إن هو مهتم بهم جداً، ما كنش في يوم من الأيام حد يمرض، إلا ويلاقي أول واحد يقف جنبه هو النبي -صلى الله عليه وسلم-، سعد بن أبي وقاص يتعب، أول واحد يروح يزوره النبي -صلى الله عليه وسلم-.

<sup>٦</sup> صحيح البخاري<sup>٧</sup> صحيح البخاري<sup>٨</sup> صحيح الجامع



فتخيلوا أنا لما أكون مريض، وأفاجأ كده إن النبي -صلى الله عليه وسلم- يسأل عليّ ويهتم بي، ويكون أول واحد يبجي يزورني، بالله عليكم أنا لما الباب يجبط عليّ وزوجتي تفتح فتقول لي ألق دا النبي -صلى الله عليه وسلم- هو اللي واقف بره، أهتم بي! دا سأل علي! اه. الصحابي الكريم ثابت بن قيس -رضي الله عنه-، اللي كان صوته جهوري شوية، ولما نزل قول الله -سبحانه وتعالى-، شوفوا يا جماعة الاهتمام "لَا تَرْفَعُوا أَصْوَاتَكُمْ فَوْقَ صَوْتِ النَّبِيِّ وَلَا تَجْهَرُوا لَهُ بِالْقَوْلِ كَجَهْرِ بَعْضِكُمْ لِبَعْضٍ أَنْ تَحْبَطَ أَعْمَالُكُمْ" الحجرات: ٢، سيدنا ثابت بن قيس بعد عن مجلس النبي -صلى الله عليه وسلم-، لأنه خاف إن عمله يجبط بسبب إن صوته عالي شوية، فالنبي يسأل هو فين ثابت بن قيس؟ اهتمام، رعاية، فين ثابت بن قيس؟ فيقولوا له والله يا رسول الله ده يعني هو في بيته قد اعتزل، وراحوا سألوا عليه معتزل ليه؟ فقال كذا كذا، أنا رجل من أهل النار، قام النبي يقول لهم: طب روحوا قولوا له أنت لست من أهل النار، بل أنت من أهل الجنة، مدى اهتمام النبي ورعاية النبي، والكلمة الطيبة، لأ أنت مش من أهل النار، أنت إن شاء الله بإذن الله من أهل الجنة، شوفوا بقى -سبحان الله-! اختيار الكلمة، أنت من أهل الجنة.

النبي -صلى الله عليه وسلم- في يوم من الأيام، كان بيقيم معاه أحد الصحابة، وكان له غلام، الغلام ده بقى يبجي يتنطط على والده ووالده يلعب معاه، فالنبي يقول له في يوم من الأيام "أتجبه؟" أنت بتجبه؟ فقال يا رسول الله: أحبك الله كما أحبه، في يوم من الأيام الراجل ده غاب عن مجلس النبي -صلى الله عليه وسلم- النبي ببسأل هو فين فلان، قالوا يا رسول الله، دا مات ولده، طلع النبي -صلى الله عليه وسلم- جري، وخبط على الباب، الراجل طبعًا حزين مهموم، مين هيقف معاه في حالة زي كده؟ هو النبي -صلى الله عليه وسلم-، فطلع جري فتح الباب، فلقى النبي قدامه، فالنبي سلم عليه وعزاه، وقام قايل له: "أيهما أحب إليك؟ إن ولدك يبقى معك، ولا إن ولدك يوم القيامة لا تأتي باب من أبواب الجنة إلا وتجد ولدك واقف على هذا الباب لا يريد الدخول الجنة إلا بعد أن يأخذ بيده بيدك ويد أمه، حتى تدخلوا الجنة سوياً"، قال يا رسول الله بل أحب الثانية، وما تركه النبي -صلى الله عليه وسلم- حتى ضحك. الابتسامه، الكلمة الطيبة، مراعاة مشاعر الناس، الاهتمام بالناس، هدي النبي -صلى الله عليه وسلم- اختيار الكلمة.

من الأمور برضه المهمة جدًا اللي الشيخ ذكرها علشان برضه تفضل العلاقة الطيبة بين الناس بعضها وبعض، هي مسألة النصيحة، وإنك تنصح أخوك، ولما تبجي تنصح أخوك ما تحدفوش بقالين طوب في دماغه، ولكن أنصحك بكلمة طيبة، تنصحك بحاجة ما تأذهوش، تذكره بالله وفي نفس الوقت لا تؤذيه.

وذكر الشيخ لنا باب كامل فقال لنا: "باب المسلم مرآة أخيه"، ذكر فيه حديث أبي هريرة، أن النبي -صلى الله عليه وسلم- قال: "المؤمن مرآة أخيه المؤمن" <sup>٩</sup>، و"المؤمن أخو المؤمن" <sup>١٠</sup>، -سبحان الله-! ده أمر عجيب جدًا، إنه يذكر لنا المؤمن مرآة أخيه، شوفوا الكلمات البسيطة دي، أنا هسألك سؤال، أنا النهاردة أنا خارج مثلاً الصبح، فشفت كده لحيي كده مش مهذبة وأنا معدي على المراية، فشفت اللحية مش مهذبة، فقمتم مسرحها كده، وقمت خارج أو عدلت القميص والبنطلون وأنا خارج، هسألكم سؤال، عمركم شفت في يوم من الأيام واحد واقف قدام المراية وهيا بتظهر له عيبه، قامت واحدة حنة من المراية كده وقامت حدفاه في دماغه، لأ، المراية بتظهر لك عيبك، وفي نفس الوقت ما بتأدكش، خالص، فالنبي لما يقول لنا "المؤمن مرآة أخيه" قدم النصيحة لأخوك المسلم، بس في نفس الوقت ما تأذهوش بالكلام، فذكر فيه حديث "المؤمن مرآة أخيه"، وذكر فيه كلمة عن أبي هريرة "المؤمن مرآة أخيه، إذا رأى فيه عيبًا أصلحه".

<sup>٩</sup> الأدب المفرد<sup>١٠</sup> صحيح مسلم

من ضمن العناية والاهتمام بأخوك لو في يوم من الأيام شفته على غلط، أنصحته، بس نصيحتك ما تكونش بصورة قاسية، أو بصورة فجأة، ولكن -سبحان الله- تكون بصورة طيبة.

أحد إخواننا في يوم من الأيام راكب العربية، وشوفوا المشهدين دول، المشهد الأول واحد جرى جرى جرى جرى، وقام جاي كسر عليه مرة واحدة وقام واخذ بيسموها الشباب غرزة كده! فقام ده طقت في دماغه وقام طالع جاري وراه، وقام جاي كسر عليه، أنت ما بتفهمش أنت مش عارف أيه؟ أنت كذا! وزعيق، فقام مرة واحدة طبعاً الباب اتفتح فلقى ثلاثة أربعة نازلين له من العربية، كبار كده، فقال له أصل أنا والله خايف عليك، أنا يعني، كانت النتيجة طبعاً حصلت خناقة كبيرة جداً وضرب وإهانة بشكل كبيرة جداً، فبيقول أنا أتعلمت أنا بعد كده لو حد جه كسر عليّ، يعني أنا هطلع أقول له بابتسامة طيبة، معلىش خد بالك بس، أصل أنا خايف عليك، أنت ممكن يكون معك أولاد أو حاجة تعمل حاجة زي كده، فممكن تحصل لك مشكلة، قال لي أفاجأ والله إن هو يقولي طب أنا أسف وحقك علي وأنا غلطان، هو هنا اللي أنا كنت عايزه وصلتهوله، النصيحة؟ ولكن النصيحة كانت بالأسلوب الطيب، بالأسلوب المهذب، اللي توصل للإنسان المعنى، وتوصل ليه المعلومة، وفي نفس الوقت ماتأذووش.

الشيخ قال لنا كمان من هذا الباب أيضاً إنك لو عايز تكسب الناس، حاول دائماً إنك تكون ذال على الخير، حاول تكون دائماً ذال على الخير، ودي تكميل لباب النصيحة، حاول دائماً تدل على الخير، لو عندك اتنين ثلاثة إخوانك، أنت اتقدمت لشغلانة وما نفعتش فيها، حاول دائماً إنك تدل إخوانك على الخير ده، أنصحهم بهذه الوظيفة، لو في يوم من الأيام سمعت درس كويس، حاول دائماً تدل إخوانك على الدرس ده لعلهم ينتفعوا بيه، لو في يوم من الأيام فيه باب خير معين أنت ماشي فيه، حاول دائماً تدل إخوانك على الباب ده، وتحسسهام دائماً أنت عايز تدلهم على الخير علشان يشاركوا معاك في هذا الخير، ده كله من باب الخير، محدش بقى يقول لي أصل الإخلاص ومش عارف إيه، الإخلاص ده شيء جميل جداً، ولكن ما أجمل منه إنك تدل إخوانك وتدل أصحابك على معاني الخير عشان تاخذ بإيديهم، وده من معاني العناية والرعاية بإخوانك، إنك تكون حريص برضه عليهم في الآخرة، فتقدم لهم أعمال المعروف، وتدلمهم على الخير.

الشيخ ذكر باب فقال: **"الدال على الخير كفاعله"**، من أهم الأمور اللي تراعي العلاقات بين الناس الدلالة على الخير، عن أبي مسعود الأنصاري قال: **"جاء رجل إلى النبي صلى الله عليه وسلم فقال يا رسول الله إني أبدو في فاحملي"** -وده كان في غزوة تبوك، أحملني، يعني هات لي بعير، أو ناقة، أو جمل، أو حصان أركب عليه، عشان أنا عايز أجاهد معاك، أنا عايز أخرج للجهاد، أنا عايز أكون حريص على الخير معاك يا رسول الله - قال: **"لا أجد ما أحملك عليه"** - النبي لحد هنا خلاص لا أجد! أنا معيش! ولكن شوفوا النبي -صلى الله عليه وسلم- يعمل أيه، قال: ولكن انت فلان، روح لفلان أنا أعرف عنه إن هو ما شاء الله عنده ما شاء الله فلوس، وعنده كذا، وعنده كذا، ويمكن يكون عنده الدابة الزيادة، فروح لفلان كده لعل، وقول له إن أنت جاي من طرفي، الدلالة على الخير، فقال: **"ولكن انت فلاناً فاعله أن يحملك"**. **فاتاه فحمله** - فلما راح له وقال له أنا جاي استشفع بالنبي -صلى الله عليه وسلم- عندك، فأرجو إن أنت تحملي، فإداله البعير اللي تبلغ معاه - فأتى رسول الله صلى الله عليه وسلم فأخبره، فقال رسول الله صلى الله عليه وسلم: **"من دل على خير فله مثل أجر فاعله"** ١١.

حاول دائماً تكون صاحب دلالة للناس على الخير، النبي -صلى الله عليه وسلم- جاءه أقوام مجتايي النمار، يُظْهَر عليهم أثر السفر، وأثر الجوع، وفقر ما عليهم هدم، فقام النبي -صلى الله عليه وسلم- فذكَر الناس، وحثَّ الناس على فعل الخير، فقام رجل من الأنصار وأتى بصرة من ذهب عجزت كف النبي إن هي تحملها، فالناس أول ما شافوا ده، كل الناس قامت بقي كل اللي كان عنده أكل زيادة عمله، جاب عنده هدم زيادة جابها، وحطها قدام النبي، حتى رأيت بين يدي النبي -صلى الله عليه وسلم- كومين كبيرين من طعام وثياب، عندها النبي -صلى الله عليه وسلم- رؤي وجهه كأنه مذهبة، حته ذهب، ليه؟ لما رأى الناس كلها عملت كده، فقام النبي -صلى الله عليه وسلم- قام ومش أثنى على الناس كلها وأعمالها، ولكن أثنى على الشخص ده وقام قايل إيه؟ "مَنْ سَنَّ فِي الْإِسْلَامِ سُنَّةً حَسَنَةً، فَلَهُ أَجْرُهَا، وَأَجْرُ مَنْ عَمِلَ بِهَا بَعْدَهُ"<sup>١٢</sup>.

حاول دائماً تكون الإنسان اللي بيدل كل الخلق على الخير، على الصفحة عندك، حاول دائماً إنك تكتب كلمة طيبة، كلمة صالحة، وحاول إنك تنشرها بين الناس، والناس ينشروها عنك. رأيت في يوم من الأيام فيديو كويس، حاول إنك تنشره بين الناس ويا جماعة اكتب كلمة كدا، يا جماعة والله أنا نشرت الفيديو ده لأن أنا عارف إن شاء الله إن أنتوا هتهتموا بيه، وإن أنتوا إن شاء الله هتنتفعوا بيه كثير جداً، يا جماعة أنا أنتفعت من الفيديو ده، وأرجو إن شاء الله إن أنتوا تنتفعوا بيه.

الكلمة الطيبة والدلالة على الخير من أكثر الأمور اللي ربنا -سبحانه وتعالى- يسر لها في قلوب الناس السبيل.

أيضاً -سبحان الله- من باب الدلالة على الخير، اللي يخلي القلوب تتآلف أوي، النبي -صلى الله عليه وسلم- في يوم أبو هريرة كان بيقول لنا أنا كنت بقف على طريق الناس، كنت جعان جداً، فكنت بقف على طريق الناس أسألمهم عن الآية، أسألمهم عن الحديث، وأنا أعلم بهم، لعل واحد منهم يقول ألحق بنا يا أبو هريرة! تعالى معانا، أبو هريرة يقول فمر علي أبو بكر، فقل له يا أبو بكر، ما تقول في آيات كذا وكذا، فأخبرني بالآية ثم انصرف، مقليش الحق بنا، علشان أروح معاه يأكلني حاجة! يشربني حاجة! ثم مر عمر، فسألته عن الآية، فقال: فيها كذا وكذا وكذا، فمر علي النبي -صلى الله عليه وسلم-، فنظر في وجهي، فعلم ما في وجهي، فقال: "ألحق بنا يا أبا هريرة" العناية والرعاية بالناس، "ألحق بنا يا أبا هريرة" قال: فلحقت به، قال: فذهبت إلى بيت النبي -صلى الله عليه وسلم-، فإذا فيه إناء من لبن أهدي إليه من أحد الأنصار، فقال النبي -صلى الله عليه وسلم-: "يا أبا هريرة! نادي أهل الصفة" روح على أهل الصفة، النبي -صلى الله عليه وسلم- فيه خير جاله، فمش عاوز يستأثر بهذا الخير، لا، أنا عايز كل إخواني يشاركوا معا في هذا الخير، "يا أبا هريرة نادي أهل الصفة"، وكانوا أربعين رجلاً، فناديتهم، فقال: "يا أبا هريرة، اسقهم"، فبدأ النبي -صلى الله عليه وسلم- يسقهم. تخيلوا يا جماعة مشاعر أبو هريرة وهو بيقول: اللبن ده كان جاي للنبي، والنبي محتاجه، لأنه كان يأتي الهلال تلو الهلال تلو الهلال، ولا يوقد في بيت النبي شيء، النبي محتاج اللبن ده، ولكن شوف النبي بيأصل لقضية إن كل إخوانك يشاركوا معاك في الخير اللي انت فيه، فنادى أهل الصفة، "اسقهم" فبدأ يسقهم واحد ورا الثاني، واحد ورا الثاني، قال: حتى سقيتهم جميعاً، ثم قال النبي -صلى الله عليه وسلم-: "اشرب يا أبا هريرة" فقال: فشربت، "اشرب يا أبا هريرة" قال: فشربت، "اشرب يا أبا هريرة" فقلت: والله يا رسول الله لا أجد له مسلماً، خلاص اللبن بقا هنا خلاص، معدتش قادر خلاص، قال: فشرب النبي -صلى الله عليه وسلم-.

ده يدريك معنى إيه؟ معنى الدلالة على الخير، خلي الناس يشاركوك في الخير اللي أنت فيه، مش زي ما بنشوف للأسف كل ما أسافر مثلاً السعودية أو في بلد أخرى، أجد بعض إخواننا اللي هما المغتربين، لو اتنين أصحاب في شركة معينة، الاتنين عمالين يوقعوا في بعض، علشان ده يمشي وبالتالي هو ده اللي يفوز بالخير كله، لا، الدلالة على الخير، أخوك لما يشوف إن أنت حريص على الخير، وإنه بتدله على الخير، صدقني العلاقات تتوطد أكثر وأكثر، ربنا يا رب يبارك فيكم.

من الدلالة على الخير أحاديث كثيرة جداً ولكن إن شاء الله نكملها بإذن الله في الدرس القادم بإذن الله -تبارك وتعالى-.

وصلى الله على نبينا محمد وعلى آله وصحبه وسلم.